



ЎЗБЕКИСТОН RESPUBLIKASI FAVQULODDA VAZIYATLAR VAZIRINING BUYRUG'I

130 -son

2022-yil "31" mart

Toshkent shahri

Вазирлик тизимида “ҳалоллик вакцинаси” тамойили асосида коррупцияга қарши курашиш, манфаатлар тўқнашуви ва одоб-ахлоқ меъёрлари бўйича махсус ўқув курсларини жорий этиш тўғрисида

Ўзбекистон Республикасининг Президентининг “Коррупцияга қарши курашиш фаолиятини самарали ташкил этишга доир қўшимча чора-тадбирлар тўғрисида” 2021 йил 6 июлдаги ПҚ-5177-сон қарори ижросини вазирлик тизимида таъминлаш ҳамда коррупцияга қарши курашиш тизими самарадорлигини ошириш мақсадида,

БУЮРАМАН:

1. Ўзбекистон Республикаси Фавқулудда вазиятлар вазирлиги тизимида “ҳалоллик вакцинаси” тамойили асосида коррупцияга қарши курашиш, манфаатлар тўқнашуви ва одоб-ахлоқ меъёрлари бўйича махсус ўқув курсларида ўқитилишини ташкил қилиш бўйича Йўриқнома 1-иловага мувофиқ;

Марказда коррупцияга қарши курашиш, манфаатлар тўқнашуви ва одоб-ахлоқ меъёрлари бўйича махсус ўқув курслари кун тартиби 2-иловага мувофиқ тасдиқлансин.

2. Фавқулудда вазиятлар вазирлиги Академияси (генерал-полковник Қ.Бердиев), Академия ҳузуридаги Фуқаро муҳофазаси институти (подполковник Б.Қурбонов), Академия ҳузуридаги Бошланғич тайёргарлик ва малака ошириш маркази (полковник С.Ахмедов) мавжуд ўқув режа ва дастурларига ўқув ҳажмининг 5 фоизидан кам бўлмаган микдорда (янги ўқув йилидан) ҳуқуқий тайёргарлик йўналишида “ҳалоллик вакцинаси” тамойили асосида коррупцияга қарши курашиш, манфаатлар тўқнашуви ва одоб-ахлоқ меъёрлари бўйича ўқув соатлари киритилсин.

3. Академия ҳузуридаги Бошланғич тайёргарлик ва малака ошириш маркази (полковник С.Ахмедов):

Марказда “ҳалоллик вакцинаси” тамойили асосида коррупцияга қарши курашиш, манфаатлар тўқнашуви ва одоб-ахлоқ меъёрлари бўйича 10 кунлик махсус ўқув курслари ташкил этилсин;

15 майга қадар ҳарбий хизматчи ва хизматчиларни мунтазам равишда коррупцияга қарши курашиш, манфаатлар тўқнашуви ва одоб-ахлоқ

меъёрлари бўйича махсус ўқув курсларида ўқитиш режаси ва ўқув дастури Фавқулодда вазиятлар вазирлиги Академияси билан келишган ҳолда ишлаб чиқилсин;

1 июндан Йўриқнома талабларига кўра, алоҳида тасдиқланган жадвалга асосан ҳарбий хизматчи ва хизматчиларчи махсус ўқув курсларида ўқитиш йўлга қўйилсин;

Марказда ташкил этиладиган махсус ўқув курсларига тегишли тажрибага эга халқаро ёки маҳаллий вазирликлар ва идоралар билан тузилган шартномалар асосида ўрнатилган тартибда ўқув материалларини тайёрлаш ҳамда ўқитишни амалга ошириш учун учинчи шахслар (ҳуқуқни муҳофаза қилувчи орган ходимлари) жалб қилиниши йўлга қўйилсин;

махсус ўқув курсларига жалб этилган ҳарбий хизматчи ва хизматчилар белгиланган тартибда Марказ ҳудудидаги турар жойда (казармада) ётиш ва ўқиш жараёнлари кун тартиби асосида ташкил этилсин.

4. Кадрлар бошқармаси (полковник С.Югай), ҳудудий бошқармалар ва таркибий тузилмалар бошлиқлари Йўриқнома талабларига кўра, махсус ўқув курсларига жалб этилган ҳарбий хизматчи ва хизматчиларнинг жадвал асосида ўқув курсларига ўз вақтида етиб боришлари таъминлансин.

5. Шахсий хавфсизлик бошқармаси (полковник Ф.Одилов), Фан, инновацион ривожлантириш ва ўқитишни ташкил этиш бўлими (полковник Б.Хикматов):

хар чоракда Йўриқнома талабига кўра, “ҳалоллик вакцинаси” тамойили асосида ўқув курсларига жалб этилган ҳарбий хизматчи ва хизматчилар рўйхати тегишли тартибда жадвал асосида ишлаб чиқилсин ва тасдиқлаш учун Фавқулодда вазиятлар вазирига киритилсин;

Йўриқномада белгиланган тартибда ўқув жараёни назорат қилинсин ҳамда биринчи навбатда коррупциявий хавф-хатарларга энг кўп мойил бўлган лавозимларни эгаллаб турган ҳарбий хизматчи ва хизматчилар коррупцияга қарши махсус ўқув курсларига жалб этилсин;

ҳарбий хизматчи ва хизматчилар ўқув жараёни якуни бўйича олинган тест синовлари ва имтиҳонларни муваффақиятли топширмаган тақдирда, тегишли чора кўриш учун бевосита уларнинг раҳбарларига ҳамда эгаллаб турган лавозимига нолайиклиги юзасидан Фавқулодда вазиятлар вазирига тақдимномалар киритилсин.

6. Фавқулодда вазиятлар вазирининг “Вазирлик тизимида ташкил этиладиган даврий таълим ўқув курсларида ҳуқуқий саводхонлик соатларини жорий этиш тўғрисида” 2019 йил 28 июлдаги 375-сонли буйруғи ўз кучини йўқотган деб ҳисоблансин.

7. Матбуот хизмати (капитан М.Садиков) вазирлик тизимида коррупцияга қарши курашиш соҳасида амалга оширилаётган ишлар вазирликнинг расмий веб-сайти ва матбуот нашрларида ёритиб борилсин.

8. Ишлар бошқармаси (полковник Ф.Азизов):

ушбу буйруқ ҳудудий бошқармалар ва таркибий тузилмаларга химояланган “Е-хат” тизими орқали юборилсин ҳамда “Гермес” ахборот тизимида жойлаштирилсин;

Ўз кучини йўқотган буйруқ ўрнатилган тартибда ҳисобдан чиқарилсин;
буйруқ барча шахсий таркибга етказилсин.

9. Мазкур буйруқ талабларининг бажарилишини назорат қилишни
ўз зиммамда қолдираман.

Вазир
генерал-майор

 **А.Қўлдошев**

Фавкулудда вазиятлар вазирининг
2022 йил 31 мартдаги 30-сонли
буйруғига 1- илова

**Ўзбекистон Республикаси Фавкулудда вазиятлар вазирлиги тизимида
“ҳалоллик вакцинаси” тамойили асосида коррупцияга қарши курашиш,
манфаатлар тўқнашуви ва одоб-ахлоқ меъёрлари бўйича махсус ўқув
курсларида ўқитилишини ташкил қилиш бўйича
Йўриқнома**

1-боб. Умумий қоидалар

1. Ушбу Йўриқнома Фавкулудда вазиятлар вазирлиги, ҳудудий бошқармалар ва таркибий тузилмалари (кейинги ўринларда – вазирлик) ҳарбий хизматчиларнинг коррупцияга қарши курашиш, манфаатлар тўқнашуви ва одоб-ахлоқ меъёрлари бўйича ўқитилишини ташкил қилиш бўйича тавсия ва қўлланмаларни белгилаб беради.

2. Ушбу Йўриқнома коррупциявий ҳаракатларнинг олдини олиш ва уларни содир қилишга хизмат қиладиган сабабларни бартараф этиш, ҳарбий хизматчиларнинг ҳуқуқий онгини ошириш ва уларни Ўзбекистон Республикаси қонунчилиги ва вазирликнинг бошқа ички ҳужжатларига қатъий риоя қилиш руҳида тарбиялашга қаратилган.

3. Вазирлик ҳарбий хизматчиларини коррупцияга қарши курашиш, манфаатлар тўқнашуви ва одоб-ахлоқ меъёрлари соҳасида ўқитиш (кейинги ўринларда – ўқитиш) дастурлари ва материаллари Ўзбекистон Республикаси қонунчилиги ва ушбу Йўриқномага мувофиқ ишлаб чиқилади.

2-боб. Ўқитишнинг асосий тамойиллари

4. Вазирлик ҳарбий хизматчиларини ўқитиш қуйидаги тамойилларга асосланади:

холислик ва илмийлик – коррупцияга қарши курашиш, манфаатлар тўқнашуви ва одоб-ахлоқ меъёрлари соҳасидаги ўқув материалларни тайёрлаш учун масъул шахслар уларнинг Ўзбекистон Республикаси қонунчилиги талаблари, халқаро стандартлар ҳамда коррупцияга қарши курашиш, манфаатлар тўқнашуви ва одоб-ахлоқ меъёрлари назарияси ва амалиётига доир илмий тадқиқотлар натижаларига мувофиқлигини таъминлайди;

амалий жиҳатдан қулайлик – вазирлик ҳарбий хизматчиларини ўқитиш шакллари, усуллари ва материаллари амалий аҳамиятга эга бўлиши, реал вазиятларга асосланиши, шунингдек ҳарбий хизматчилар томонидан олинган билимларни тушуниш даражаси ва уларни аниқ амалий вазифаларни ҳал этишда қўллаш имкониятини назорат қилинишини ўз ичига олиши лозим;

кетма-кетлилик ва тизимлилик – коррупцияга қарши курашиш, манфаатлар тўқнашуви ва одоб-ахлоқ меъёрлари соҳасидаги ўқув материаллари, шунингдек вазирлик ҳарбий хизматчиларини ўқитиш тартиби изчил ва тузилмавий-мантиқий тизимни ифодалайди. Ўқитиш умумий тушунчалар ва воқеликлардан жузъийларига, оддийдан мураккабга, бошланғичдан мукамалга ва ҳ.к ўтиш асосида амалга оширилади;

хаммабоплик – ўқитиш вазирлик ҳарбий хизматчиларининг жорий билимлари ва кўникмаларини ҳисобга олиш, вазирликнинг барча ҳарбий хизматчилари учун тушунарли бўлган ўқув материалларини шакллантириш;

дифференциаланган ёндашув – вазирликда коррупцияга қарши ўқитиш аниқ функциялар ва тартиб-таомиллардаги коррупциявий хавф-хатар натижаларини ҳисобга олади. Коррупциявий хавф-хатарларга энг кўп мойил бўлган лавозимларни эгаллаб турган ҳарбий хизматчилар коррупцияга қарши кўшимча равишда махсус ўқитилади;

ўқитиш усуллари ва шакллариини доимий равишда такомиллаштириш – вазирлик ўқув материалларини ишлаб чиқиш, ўқитиш, шунингдек вазирлик ҳарбий хизматчилари томонидан билимлар ўзлаштирилганини текшириш вақтида техник ва илмий тараққиётнинг инновацион ютуқларидан фойдаланишга ҳаракат қилади.

3-боб. Ўқитишнинг устувор вазифалари

5. Ўқитиш шакллари ва усуллари аниқлашда, шунингдек коррупцияга қарши курашиш, манфаатлар тўқнашуви ва одоб-ахлоқ меъёрлари соҳасидаги ўқув материалларини шакллантиришда вазирлик ҳарбий хизматчиларини коррупцияга қарши курашиш, манфаатлар тўқнашуви ва одоб-ахлоқ меъёрлари соҳасида ўқитиш учун масъул шахслар қуйидаги устувор вазифаларга таяниши лозим:

коррупция моҳияти, унинг жамият ҳаётининг турли соҳалари, вазирликнинг функция ва тартиб-таомилларида пайдо бўлиш шакллари ва ўзига хос жиҳатлари, сабаблари, ижтимоий жиҳатдан хавфли ва зарарли оқибатлари тўғрисида умумий тасаввурни шакллантириш;

Ўзбекистон Республикаси қонунчилиги, вазирликнинг Коррупцияга қарши кураш сиёсати билан белгиланган коррупцияга қарши курашиш, манфаатлар тўқнашуви ва одоб-ахлоқ меъёрлари ҳулқ-атворнинг ахлоқий кадриятлари ва вазирликнинг бошқа ички ҳужжатларига қатъий ва сўзсиз риоя қилишга асосланган ҳулқ-атвор моделини шакллантириш;

вазирлик ҳарбий хизматчиларини вазирликда амал қилувчи коррупцияга қарши кураш тамойиллари, талаблари ва тартиб-таомиллари билан таништириш;

коррупциявий хавф-хатарларнинг келиб чиқишига хизмат қилувчи шарт-шароитларни аниқлаш ва уларнинг олдини олиш қобилиятини шакллантириш, коррупциявий хулқ-атвор, вазирликнинг этик одоб-ахлоқ меъёрлари бузилишига нисбатан тоқатсизликни намоён этиш.

4-боб. Ўқитишни ишлаб чиқиш ва ўтказишга масъул шахслар

6. Фавқулодда вазиятлар вазирлиги Академияси, Академия хузуридаги Фуқаро муҳофазаси институти ва Академия хузуридаги Бошланғич тайёргарлик ва малака ошириш маркази томонидан вазирлик ҳарбий хизматчи ва хизматчиларини ўқитиш режаларини тайёрлаш, тегишли ўқув материалларини ишлаб чиқиш, ўқитиш, шунингдек вазирликда бундай ўқитишни мувофиқлаштириш ва мониторинг қилиш учун вазирлик Фан, инновацион ривожлантириш ва ўқитишни ташкил этиш бўлими масъулдир.

Фавқулодда вазиятлар вазирлиги Академияси, Академия хузуридаги Фуқаро муҳофазаси институти ва Академия хузуридаги Бошланғич тайёргарлик ва малака ошириш марказида мавжуд ўқув режа ва дастурларига ўқув ҳажмининг **5 фоизидан кам** бўлмаган миқдорда ҳукукий тайёргарлик йўналишида “ҳалоллик вакцинаси” тамойили асосида коррупцияга қарши курашиш, манфаатлар тўқнашуви ва одоб-ахлоқ меъёрлари бўйича ўқув соатлари киритилади.

Академия хузуридаги Бошланғич тайёргарлик ва малака ошириш марказида коррупцияга қарши курашиш, манфаатлар тўқнашуви ва одоб-ахлоқ меъёрлари бўйича 10 кунлик **махсус ўқув курслари** ташкил этилади.

7. Вазирликнинг коррупцияга қарши курашиш ички назорат тузилмаси-Шахсий хавфсизлик бошқармаси (кейинги ўринларда – Шахсий хавфсизлик бошқармаси) вазирлик ҳарбий хизматчиларини ўқитиш режаларининг тайёрланиши, коррупцияга қарши кураш соҳасидаги ўқув материалларнинг ишлаб чиқиши, ўқитиш ўтказилишини назорат қилади.

8. Вазирликнинг Фан, инновацион ривожлантириш ва ўқитишни ташкил этиш бўлими ўқитиш интизоми ва унга доир ахборотлар жамланишини назорат қилади.

9. Фавқулодда вазиятлар вазирлиги Академияси хузуридаги Бошланғич тайёргарлик ва малака ошириш марказида ташкил этиладиган махсус ўқув курсларига тегишли тажрибага эга халқаро ёки маҳаллий вазирликлар ва идоралар билан тузилган шартномалар (вазирликда белгиланган тартибда) асосида ўқув материалларини тайёрлаш ҳамда ўқитишни амалга ошириш учун учинчи шахслар (ҳуқуқни муҳофаза қилувчи орган ходимлари) жалб қилинади.

5-боб. Ўқитиш турлари ва шакллари

10. Ўқитиш қуйидаги турларни ўз ичига олади:

барча ҳарбий хизматчи ва хизматчиларни коррупцияга қарши курашиш, манфаатлар тўқнашуви ва одоб-ахлоқ меъёрлари бўйича умумий ўқитиш;

коррупциявий хавф-хатарга энг кўп мойил бўлган лавозимлар учун коррупцияга қарши курашиш, манфаатлар тўқнашуви ва одоб-ахлоқ меъёрлари бўйича махсус ўқув курслари;

вазирликда коррупцияга қарши курашиш тизимининг амал қилиши ва ривожланиши учун масъул бўлган ҳарбий хизматчилар учун коррупцияга қарши махсус ўқитиш.

12. Коррупцияга қарши курашиш, манфаатлар тўқнашуви ва одоб-ахлоқ меъёрлари бўйича умумий ўқитиш вазирликнинг барча ҳарбий хизматчилари учун мажбурий ҳисобланади.

13. Вазирликнинг барча ҳарбий хизматчилари учун коррупцияга қарши умумий ўқитиш амалий йўналтирилган бўлиши ва қуйидаги янги билимларга эга бўлиш ёки мавжуд билимларни такрорлаш имкониятини яратиши лозим:

Ўзбекистон Республикасининг коррупцияга қарши қонунчилиги, вазирликнинг коррупцияга қарши курашиш масалалари, жумладан ўрнатилган таъқиқлар, чекловлар, ҳуқуқ ва мажбуриятлар, хизмат хулқ-атвориغا қўйилган талаблар, вазирлик ҳарбий хизматчиларининг коррупциявий ҳаракатлари аниқланганда ҳаракатлар кетма-кетлигига доир ички ҳужжатларини билиш;

коррупцияга қарши курашиш, манфаатлар тўқнашуви ва коррупцияга қарши бошқа талаблар соҳасидаги ҳуқуқни қўллаш амалиётига доир билимлар;

олинган билимларни қўллаш кўникмалари, жумладан вазирликнинг турли фаолият соҳаларидаги коррупциявий хавф-хатарларни баҳолаш қобилияти, вазирликда ўрнатилган коррупцияга қарши кураш чораларини амалиётда қўллаш билиш.

Коррупцияга қарши умумий ўқитиш материалларига киритиш учун мазкур Йўриқномага 1-иловада келтирилган мавзулардан фойдаланиш тавсия этилади.

14. Вазирлик ҳарбий хизматчиларининг одоб-ахлоқ меъёрлари одоб-ахлоқ меъёрлари бўйича умумий ўқитиш вазирликнинг барча ҳарбий хизматчилари учун амалий йўналтирилган бўлиши ва вазирликда қабул қилинган этика тамойиллари ва қоидаларига доир янги билимларга эга бўлиш ёки бор билимлар такрорланишини таъминлаши лозим.

15. Вазирлик ҳарбий хизматчилари умумий коррупцияга қарши ўқитиш ва ҳарбий хизматчилар одоб-ахлоқ меъёрлари одоб-ахлоқ меъёрлари натижалари бўйича ўрганилган материал қанчалик ўзлаштирилгани ва тушунилганлиги ҳамда олинган билим ва кўникмаларни амалиётда қўллаш имкониятини текширишга қаратилган тест синовларини топшириши лозим.

16. Вазирлик ҳарбий хизматчилари саволларнинг камида 72 фоизига тўғри жавоб берган тақдирда, коррупцияга қарши умумий ўқитиш ва одоб-ахлоқ меъёрларини муваффақиятли ўзлаштирган ҳисобланади.

Агар ҳарбий хизматчи саволларнинг 72 фоизидан камига тўғри жавоб берган бўлса, у такрорий тест синовларини (оғзаки, ёзма, тест шакли) 1 (бир) иш куни ичида қайта топшириши мумкин.

17. Коррупциявий хавф-хатарга энг кўп мойил бўлган лавозимлар учун махсус коррупцияга қарши ўқитиш коррупцияга қарши умумий ўқитишдан мустақил (қўшимча) равишда ўтказилади.

18. Коррупциявий хавф-хатарга энг кўп мойил бўлган лавозимлар рўйхати вазирлик ҳудудий бошқармалари ва таркибий тузилмаларида коррупциявий хавф-хатарларни баҳолаш услубиётига мувофиқ шакллантирилади.

19. Коррупциявий хавф-хатарга энг кўп мойил бўлган лавозимлар учун коррупцияга қарши махсус ўқитиш қуйидагилар тўғрисидаги маълумотни ўз ичига олиши лозим:

коррупциявий хавф-хатарга энг кўп мойил бўлган аниқ функция ва тартиб-таомиллардаги коррупциявий хавф-хатарларни аниқлаш ва минималлаштириш усуллари;

коррупциявий хавф-хатарга энг кўп мойил бўлган аниқ функция ва тартиб-таомиллардаги коррупциянинг намоён бўлиш шакллари ва турлари;

учинчи шахслар билан ўзаро алоқа қилишда коррупциявий хавф-хатарга энг кўп мойил бўлган аниқ функция ва тартиб-таомилларга хос бўлган коррупцияга қарши талаблар;

коррупциявий хавф-хатарга энг кўп мойил бўлган аниқ функцияларни амалга оширишда қўлланиладиган қўшимча талаб ва тартиб-таомилларни ўз ичига олувчи ички ҳужжатлар.

20. Вазирликда коррупцияга қарши курашиш тизимининг амал қилиши ва ривожланиши учун масъул ҳарбий хизматчиларни (Шахсий хавфсизлик бошқармаси, ҳудудий Шахсий хавфсизлик бўлими ва таркибий тузилмаларда Кадрлар, тарбиявий ва мафкуравий ишлар бўлимлари ҳарбий хизматчилари) коррупцияга қарши махсус ўқитиш қоида тариқасида уч йилда камида бир марта малака ошириш шаклида (семинар, тренинг ва бошқа) ёки икки йилда бир марта ўқув курсларида ёхуд коррупцияга қарши кураш соҳасидаги экспертларни жалб қилиш, шунингдек бундай ўқитишларга ихтисослашган ваколатли учинчи шахслар (вазирликлар ва идоралар) томонидан ташкил этиладиган тренингларда иштирок этиш орқали ўтказилади.

21. Вазирликда коррупцияга қарши курашиш тизимининг амал қилиши ва ривожланиши учун масъул ҳарбий хизматчиларни коррупцияга қарши махсус ўқитиш Ўзбекистон Республикасининг коррупцияга қарши курашиш бўйича қонунчилигидаги ўзгаришлар, коррупцияга қарши тизимларни шакллантириш ва давлат органларида коррупциянинг олдини олиш тадбирларини амалга ошириш борасидаги илгор халқаро методикаларни ўрганишни ўз ичига олиши лозим.

22. Ушбу Йўриқноманинг **20-бандида** кўрсатиб ўтилган малака ошириш ва тренинглардан ўтиш йилига камида 10 (ўн) соатни ўз ичига олиши лозим.

6-боб. Ўқитиш муддатлари ва даврийлиги

23. Ўқитиш Ўзбекистон Республикаси қонунчилиги ва вазирликнинг ички ҳужжатларида кўзда тутилган мажбурий малака ошириш доирасида ўқитиш, учинчи шахслар билан қўшма конференциялар, йиғилишлар, симпозиумлар ўтказилишидан қатъий назар амалга оширилади.

24. Вазирлик ҳарбий хизматчилари коррупцияга қарши кураш ва одоб-ахлоқ меъёрлари соҳасида қоида тариқасида уч йилда бир марта ўқитилади.

25. Вазирлик ҳарбий хизматчилари қуйидаги ҳолларда коррупцияга қарши курашиш бўйича қоида тариқасида уч йилда бир мартадан кўп ўқитилиши мумкин:

ҳарбий хизматчи коррупциявий хавф-хатарга энг кўп мойил бўлган лавозимни эгаллаб турган бўлса;

лавозимга тайинланганда ва ротация қилинганда, агар шахснинг янги лавозими коррупциявий хавф-хатарга энг кўп мойил бўлган лавозимлар рўйхатига кирса;

вазирликда коррупциявий ҳаракатлар билан боғлиқ ҳолатлар аниқланганда ёки амалга оширилаётган функция тартиб-таомилнинг коррупциявий хавф-хатар даражаси ортганда;

вазирлик раҳбари қарорига мувофиқ.

26. Вазирликка ишга қабул қилинган ёки янги лавозимга тайинланган ҳарбий хизматчилар (агар муқаддам ўқишга жалб этилмаган бўлса) ишга кирган ёки янги лавозимга тайинланган вақтдан бошлаб, қоида тариқасида 30 кун ичида коррупцияга қарши ва вазирлик ҳарбий хизматчиларининг одоб-ахлоқ меъёрлари бўйича умумий ўқитилиши шарт.

Ўқув санасини белгилашда коррупцияга қарши кураш ва одоб-ахлоқ меъёрлари соҳасида ўқитишнинг тасдиқланган чораклик жадвали, гуруҳда бўш ўринлар борлиги (кундузги ўқув шакли учун) ва мазкур бобнинг 22-23-бандларида кўзда тутилган ўқитиш муддатлари ва даврийлигига амал қилиш зарурати ҳисобга олинади.

Кейинги коррупцияга қарши умумий ўқитиш ва вазирлик ҳарбий хизматчиларининг одоб-ахлоқ меъёрлари бўйича умумий ўқитиш барча ҳарбий хизматчилар учун уч йилда бир мартадан кам бўлмаган даврийликда белгиланади.

Махсус ўқув курслари камида қоида тариқасида **10 кун муддатга 60 соат** этиб белгиланади.

27. Ҳарбий хизматчи коррупциявий хавф-хатарга энг кўп мойил бўлган лавозимни эгаллаб тургани билан боғлиқ ҳолатларда ёки ҳарбий хизматчи шундай лавозимга тайинланганда махсус коррупцияга қарши ўқитиш

коррупцияга қарши кураш ва одоб-ахлоқ меъёрлари соҳасида ўқитишнинг чораклик жадвалида белгиланган муддатларда амалга оширилади.

28. Фан, инновацион ривожлантириш ва ўқитишни ташкил этиш бўлими ва Шахсий хавфсизлик бошқармаси билан биргаликда махсус ўқув курлари учун ҳар чорак якунида кейинги чорак ўқитиш жадвалини тузади ва уни Фавқулодда вазиятлар вазирига тасдиқлаш учун тақдим этади.

Ўқитиш жадвалини тузишда ҳарбий хизматчилар томонидан олдинги ўқитиш муддатлари ҳисобга олинади.

Ўқитиш жадвалида албатта ўқитиш курси номи, санаси, шунингдек ўқитиш тайинланган лавозимлар кўрсатилади.

Тасдиқланган жадвалга мувофиқ ҳудудий бошқармалар ва таркибий тузилмалар кадрлар бўлими ҳарбий хизматчилари ўқитиш бошланишидан 10 иш кун олдин ҳарбий хизматчиларни хабардор қилади. Белгиланган муддатда ўқиш имконияти бўлмаса (*кундузги ўқув шакли учун, ҳарбий госпиталда даволанишда, режаслаштирилган таътил, чет давлатда хизмат сафари сингари асосли сабаблар*), ҳарбий хизматчи ўқиш бошланишидан 5 (беш) иш кунидан кечиктирмай ўқишни бошқа санага кўчириш мақсадида Фан, инновацион ривожлантириш ва ўқитишни ташкил этиш бўлимини ёзма равишда огоҳлантириб қўйиши лозим.

7-боб. Ўқитиш интизомии нazorат қилиш ва ҳужжатларни сақлаш

29. Фан, инновацион ривожлантириш ва ўқитишни ташкил этиш бўлими вазирлик ҳарбий хизматчиларининг коррупцияга қарши курашиш, манфаатлар тўқнашуви ва одоб-ахлоқ меъёрлари соҳасида ўқитилишига доир маълумотларни йиғиб боради ва уларни ҳар чоракда вазирликнинг Шахсий хавфсизлик бошқармасига тақдим этади.

Шахсий хавфсизлик бошқармаси олинган маълумотларни таҳлил қилади (жумладан, ўқув интизоми, ҳарбий хизматчилар учун қийинчилик туғдираётган мавзулар ва тест саволлари) ва таҳлил натижаларини коррупцияга қарши тизимнинг амал қилиши ва ривожланиши масалалари бўйича доимий ҳисоботларга киритилишини, шунингдек ўқув материаллари мослаштирилишини зарурат туғилганда таъминлайди.

30. Ҳарбий хизматчи ўқув курслари якуни бўйича тест синови ва якуний имтихондан белгиланган муддатларда ўтолмаса, Шахсий хавфсизлик бошқармаси бошлиғи томонидан бундай ҳарбий хизматчининг раҳбарига унга нисбатан тегишли қарор қабул қилиш мақсадида тақдимнома киритади ёхуд унинг эгаллаб турган лавозимига нолайиклиги юзасидан Фавқулодда вазиятлар вазирига тақдимнома киритади.

31. Ўқитиш жадвали, йўқлама варақалари, тест натижалари, ҳарбий хизматчи ўқиганлигини тасдиқловчи бошқа ҳужжатлар ўқиш ўтказиладиган

муассасаларда сақланади ва керакли ҳужжатларни Фан, инновацион ривожлантириш ва ўқитишни ташкил этиш бўлимига тақдим этади.

Ўқитиш яқунларида тест синовлари ва яқуний имтихонларни муваффақиятли топширган ҳарбий хизматчиларга коррупцияга қарши курашиш, манфаатлар тўқнашуви соҳасида ўқув курсини тамомлаганлиги тўғрисидаги сертификат ўқув курсини ўтказган муассаса бошлиғи томонидан берилади.

8-боб. Яқуний қоидалар

32. Ушбу Йўриқнома Ўзбекистон Республикаси қонунчилиги ва вазирликнинг ички ҳужжатларидаги ўзгаришлар қиритилганда, коррупцияга қарши ўқитишни ташкил этиш соҳасидаги илғор халқаро амалиёт ўзгарган тақдирда қайта кўриб чиқилади. Вазирликнинг Шахсий хавфсизлик бошқармаси мазкур Йўриқномага ўзгартириш қиритиш учун жавобгар ҳисобланади.

33. Вазирлик ҳарбий хизматчилари эгаллаб турган лавозими, иш стажи, мавқеи ва бошқа омиллардан қатъий назар мазкур Йўриқноманинг тамойиллари ва талабларига риоя қилиш учун шахсан жавобгар ҳисобланади.

34. Мазкур Йўриқнома талабларини бузган шахслар қонун ҳужжатларида белгиланган тартибда жавобгарликка тортиладилар.

Фавкуллода вазиятлар вазирлиги тизимида “ҳалоллик вакцинаси” тамойили асосида коррупцияга қарши курашиш, маифаатлар тўқнашуви ва одоб-ахлоқ меъёрлари бўйича махсус ўқув курсларида ўқитилишини ташкил қилиш бўйича Йўриқномага 1-илова

Вазирлик тизими шахсий таркибини коррупцияга қарши курашиш бўйича умумий ўқитиш наъмунавий МАВЗУЛАРИ

Мавзу	Компонентлар
Коррупциянинг табиати	Коррупция тушунчаси, унинг шакллари ва келиб чиқиш сабаблари; Коррупциянинг ижтимоий-ҳуқуқий ходиса сифатидаги мазмуни; Жамиятда коррупцияга нисбатан муносабат.
Коррупцияга қарши курашишнинг ҳуқуқий асослари	Коррупцияга қарши курашиш соҳасидаги миллий қонунчилик; Вазирликда коррупцияга қарши курашишга доир ички меъёрий ҳуқуқий ҳужжатлар; Коррупцияга қарши курашиш бўйича халқаро амалиёт.
Вазирликда коррупцияга қарши курашиш усуллари	Вазирликдаги коррупцияга қарши курашиш тизими элементлари, шунингдек муҳим чора-тадбирлар шарҳи; Вазирликдаги маифаатлар тўқнашувининг олдини олиш, аниқлаш ва тартибга солиш; Вазирликнинг коррупцияга қарши курашиш амалиёти сиёсати; Коррупцияга қарши курашиш соҳасида ҳарбий хизматчилар ва таркибий бўлинмаларнинг мажбурият ва ваколатлари; Коррупциявий ҳаракатлар, уларни содир этиш хавфи юзага келган вақтдаги ҳаракатлар; Коррупциявий ҳаракатлар тўғрисида хабар бериш (хабарларни узатиш каналлари, хабарлар мазмунига доир Йўриқнома, хабарларни кўриб чиқиш тамойиллари).
Коррупциявий хавф-хатарлар ва типик коррупциявий ҳаракатлар	Вазирликдаги учраши мумкин бўлган коррупциявий хавф-хатарлар ва коррупциявий ҳаракатларнинг асосий турлари;

Мавзу	Компонентлар
	<p>Назорат-рухсат бериш функциялари ва тартиб-таомиллари доирасидаги коррупциявий хавф-хатарлар;</p> <p>Совғалар ва ишбилармонлик меҳмондўстлиги белгиларининг олди-бердисидаги бериш-олишдаги коррупциявий хавф-хатарлар;</p> <p>Фуқаролар, контрагентлар ва учинчи шахслар билан ўзаро алоқалар билан боғлиқ коррупциявий хавф-хатарлар;</p> <p>Ҳарбий хизматчиларни вазирликка тизимга хизматга танлаб олишдаги ва ишга қабул қилишдаги коррупциявий хавф-хатарлар;</p> <p>Харидларни амалга ошириш билан боғлиқ коррупциявий хавф-хатарлар;</p> <p>Хизмат турлари, функциялар учун лицензия бериш, шунингдек лицензия битимлари талаблари ва шартларини бажариш устидан назорат билан боғлиқ коррупциявий хавф-хатарлар;</p> <p>Биноларни ижарага бериш билан боғлиқ коррупциявий хавф-хатарлар;</p> <p>Ўзаро ҳамкорлик ва тасарруфий вазирликлар фаолиятини мувофиқлаштириш билан боғлиқ коррупциявий хавф-хатарлар;</p> <p>Танловлар билан боғлиқ коррупциявий хавф-хатарлар;</p> <p>Турли хужжат турлари экспертизасини ўтказиш, шунингдек улар ижросини назорат қилиш билан боғлиқ коррупциявий хавф-хатарлар;</p> <p>Давлат назоратини амалга ошириш билан боғлиқ коррупциявий хавф-хатарлар;</p> <p>Вазирлик фаолиятидаги учраши мумкин бўлган бошқа хавф-хатарлар.</p>
<p>Коррупциявий ҳаракатлар учун жавобгарлик</p>	<p>Коррупциявий ҳаракатлар учун интизомий жавобгарлик;</p> <p>Коррупциявий ҳаракатлар учун жиноий жавобгарлик;</p> <p>Ўзбекистон Республикасиданинг коррупциявий ҳаракатларга доир ишлари бўйича суд амалиёти шарҳи.</p>
<p>Коррупцияга қарши курашишда фуқаролик жамияти роли</p>	<p>Жамоатчилик назорати коррупцияга қарши курашиш воситаси сифатида;</p> <p>Фуқароларнинг ҳуқуқий маданиятини ошириш;</p> <p>Коррупцияга қарши жамоатчилик фикри ва ҳуқ-атворини шакллантириш;</p> <p>Фуқаролик жамияти институтларининг вазирлик билан ўзаро ҳамкорлиги.</p>



O'ZBEKISTON RESPUBLIKASI FAVQULODDA VAZIYATLAR VAZIRLIGI
AKADEMIYASI HUZURIDAGI BOSHLANG'ICH TAYYORGARLIK
VA MALAKA OSHIRISH MARKAZI

SERTIFIKAT

“Halollik vaksinasi” maxsus o‘quv kursini tamomladi

Leytenant Raximov Alisher Farxadovich

“Halollik vaksinasi” tamoyili asosida korrupsiyaga qarshi kurashish, manfaatlar to‘qnashuvi va odob-axloq me‘yorlari bo‘yicha 60 soatlik “Korrupsiyaga qarshi kurashish” maxsus o‘quv kursida tayyorgarlikdan o‘tdi.

Markaz bo‘shlig‘i, polkovnik

S.F.AXMEDOV

Kotib, mayor

J.A.MAMASOLIYEV

M.O‘.

31.03.2022 yil

Фавқулодда вазиятлар вазирининг
2022 йил 31 мартдаги 130-сонли
буйруғига 2-илова

“ТАСДИҚЛАЙМАН”
Ўзбекистон Республикаси ФВВ
Академияси ҳузуридаги БТ ва МО
маркази бошлиғи

(лавозими, унвони)

(имзо)

(Ф.И.О.)

202__ йил “__”

**Марказда коррупцияга қарши курашиш ва одоб-ахлоқ меъёрлари
бўйича махсус ўқув курслари
КУН ТАРТИБИ**

Т/р	Тадбирлар номи	Ўтказиш вақти	Давоми
1.	Тингловчиларни уйғотиш	06 ⁰⁰ -06 ¹⁰	10 дақиқа
2.	Эрталабки бадантарбия	06 ¹⁰ -06 ⁵⁰	40 дақиқа
3.	Ювениш, ётоқхоналарни тартибга келитириш	06 ⁵⁰ -07 ²⁰	30 дақиқа
4.	Нонушта	07 ²⁰ -07 ⁵⁰	30 дақиқа
5.	Эрталабки кўрик	07 ⁵⁰ -08 ⁰⁰	10 дақиқа
6.	Саф тайёргарлиги бўйича машқ ўтказиш	08 ⁰⁰ -08 ³⁰	30 дақиқа
7.	Таксимот	08 ³⁰ -08 ⁴⁵	15 дақиқа
8.	Ўқув машғулотларига тайёргарлик кўриш	08 ⁴⁵ -09 ⁰⁰	15 дақиқа
9.	Ўқув машғулотлари; I-жуфтлик дарслари	09 ⁰⁰ -10 ²⁰	80 дақиқа
	Танаффус	10 ²⁰ -10 ³⁰	10 дақиқа
	II-жуфтлик дарслари	10 ³⁰ -11 ⁵⁰	80 дақиқа
	Танаффус	11 ⁵⁰ -12 ⁰⁰	10 дақиқа
	III-жуфтлик дарслари	12 ⁰⁰ -13 ²⁰	80 дақиқа
10.	Тушлик	13 ²⁰ -14 ⁰⁰	40 дақиқа
11.	Шахсий вақт	14 ⁰⁰ -15 ⁰⁰	60 дақиқа
12.	Мустақил тайёргарлик соати	15 ⁰⁰ -16 ²⁰	80 дақиқа
	Танаффус	16 ²⁰ -16 ³⁰	10 дақиқа
13.	Ижтимоий-сиёсий, тарбиявий тадбирлар, саф ва спорт машғулотларини ўтказиш	16 ³⁰ -18 ⁰⁰	90 дақиқа
14.	Шахсий вақт	18 ⁰⁰ -19 ⁰⁰	60 дақиқа
15.	Кечки овқат	19 ⁰⁰ -19 ³⁰	30 дақиқа
16.	Теледастурлар томоша қилиш	19 ³⁰ -21 ⁰⁰	90 дақиқа
17.	Кечки сайр	21 ⁰⁰ -21 ³⁰	30 дақиқа
18.	Кечки йўклама	21 ³⁰ -21 ⁴⁵	15 дақиқа
19.	Уйқуга ётиш	21 ⁴⁵ -22 ⁰⁰	15 дақиқа
20.	Уйқу	22 ⁰⁰ -06 ⁰⁰	08 соат

Изоҳ: Зарур ҳолатларда Марказ бошлиғи томонидан белгиланган кун тартибига ўзгартиришлар киритилиши мумкин.